

সেই বইটি

নারায়ণ গঙ্গোপাধ্যায়

লেখক পরিচয়

[নারায়ণ গঙ্গোপাধ্যায় (১৯১৮-১৯৭০)। আসল নাম তারকনাথ। ১৯৪১ সালে কলকাতা বিশ্ববিদ্যালয়ে বাংলায় প্রথম শ্রেণিতে প্রথম হন। প্রথমে সিটি কলেজে, তারপর কলকাতা বিশ্ববিদ্যালয়ে অধ্যাপনা করেন এবং অধ্যাপক হিসাবে উচ্চ প্রশংসিত হন। প্রথমে ছাত্রাবস্থায় কাব্য রচনা দিয়ে সাহিত্য জীবনের সূত্রপাত। তারপর গল্প, উপন্যাস, নাটক, রম্য রচনা ইত্যাদিতে অসাধারণ প্রতিভার স্বাক্ষর রাখেন। সাহিত্য সমালোচনা ও সাংবাদিকতায় খ্যাতি অর্জন করেন। চল্লিশের দশকে তিনখন্ডে লেখা উপন্যাস 'উপনিবেশ' তাঁকে বাংলা সাহিত্য জগতে প্রথম সারিতে প্রতিষ্ঠিত করে। তাঁর অন্যান্য বিখ্যাত রচনা 'বীতংস', 'সূর্যসারথি', 'তিমির তীর্থ', 'আলোর সরণি', 'শিলালিপি', 'বৈতালিক' এক সময় বাংলা সাহিত্য জগতে আলোড়নের সৃষ্টি করে।

'সুনন্দ' ছদ্মনামে ধারাবাহিক লেখাগুলি রম্য-রচনা সাহিত্যে স্টাইলের আদর্শ উদাহরণ। উপন্যাসিক হিসাবে যেমন, ছোটগল্পের সফল রচয়িতা হিসাবেও তেমনই তিনি সমান দক্ষতা দেখিয়েছেন। তাঁর গল্পগুলির বৈচিত্র্যময় বিষয়ভাবনা বা খীমের অভিনবত্ব পাঠকদের চমৎকৃত করে।

সমালোচনা সাহিত্যেও তাঁর অবদান স্মরণীয়। 'ছোটগল্প বিচিত্রা', 'ছোটগল্পের সীমারেখা', 'রবীন্দ্রনাথ', 'সাহিত্য ও সাহিত্যিক' প্রমুখ গ্রন্থগুলি অসাধারণ বিশ্লেষণী প্রতিভার সঙ্গে রস সম্পৃক্ত মানসিকতার সুমধুর মিশ্রণে চিত্তাকর্ষক হয়ে উঠেছে। ছোটদের জন্য লেখা তাঁর গল্পগুলি কম মূল্যবান নয়। তাঁর টেনিদার গল্পগুলি যুগোত্তীর্ণ মহিমা অর্জন করেছে। তাঁর কোন কোন গল্পে সরসতার সঙ্গে রোমান্টিক বিষাদের নিপুণ সংমিশ্রণ এক অভিনব স্বাদের সৃষ্টি করেছে।]

প্রকাশের দোকানে বসেছিলাম। সামনে কাউন্টারের ওপর নানা আকারের নানা রঙের বই।

অসংখ্য মানুষের অসংখ্য মনের যেন এক বিশাল পৃথিবী এই বইগুলো। কত চিন্তা—কত গবেষণা—জ্ঞান—বিজ্ঞানের কত খবর। সুখ—দুঃখ, কান্না—হাসি, গল্প—কবিতা, রোমাঞ্চ—অ্যাডভেঞ্চারের স্বপ্নপুরী।

অন্যমনস্কভাবে বইগুলো নাড়াচাড়া করছি, হঠাৎ একখানা বইয়ের ওপর এসে চোখ আটকে গেল আমার। মলাটে সেই পুরোনো ছবিটি—সেই গাঢ় নীল বড়ো বড়ো হরফের লেখা, ‘গহন বনের গল্প’। লেখক প্রিয়দর্শন মিত্র।

আকাশে যেমন উল্কা ঝরে, তেমনিভাবে কতগুলো বছর ঝরে গেছে। কত অদল—বদল হয়েছে পৃথিবীর! আমরা যারা ছোট ছিলাম তারা বড়ো হয়ে গেছি—যাঁরা বড়ো ছিলেন, বুড়িয়ে গেছেন তাঁরা। ছেলেদের জন্য হাজার হাজার রংচঙে বইয়ে ছেয়ে গেছে বাজার। তাদের মাঝখান থেকে বহুদিনের চেনা বইখানা সেই চেনা চেহারা নিয়ে করুণ চোখে যেন আমার দিকে তাকাল।

প্রকাশককে বললাম এ বইটার দাম কত?

একটু অবাক হলেন প্রকাশক—কী করবেন ও বই নিয়ে? ছেলেদের পড়বার বাতিক আছে নাকি আপনার?

বললাম তা আছে। আমারও যে একটা ছেলেবেলা ছিল, এসব বই দেখলে সেকথা মনে পড়ে যায়। এটা আমি নেব।

প্রকাশক তবু বললেন, নিতেই যদি হয়, নতুন বই কিছু নিন বরং। ওসব তো পুরানো হয়ে গেছে। আজকালকার ছেলেরা আর পড়ে না।

—তা হোক! এইটেই আমার দরকার। কত দাম?

প্রকাশক বন্ধু লোক। হেসে বললেন, এমনিই নিয়ে যান। ওর আর দাম দিতে হবে না।

বাইরে এসে দাঁড়িলাম ট্রাম-স্টপের পাশে। দুপাশে বাড়িগুলোর মাথায় বেলাশেষের রাঙা আলো ঝিকমিক করছে—ছায়া ঘনিয়ে পড়েছে রাস্তার ওপর। ঠান্ডা মিষ্টি হাওয়া বইছে। বইটাকে কাছে আঁকড়ে ধরে ট্রামের অপেক্ষায় দাঁড়িয়ে রইলাম আমি।

নিজে বই লিখি এখন। সাহিত্যিক বন্ধুর অভাব নেই—নতুন বই পাওয়ার দুঃখও নেই আর। তবু এই ‘গহন বনের গল্প’ কোনোদিন এমনি করে হাতের আসবে, তা কল্পনাতেও ছিল না। মনে হল হাতের মুঠোর মধ্যে পেয়েও যে হীরেটা হারিয়ে ফেলেছিলাম একদিন আজ অযাচিতভাবে তা আমার কাছে ফিরে এল। এখন এ আমার—চিরদিনের মতোই আমার।

ট্রাম এল। চেপে বসে কন্ডাক্টরকে বললাম এসপ্লান্ডে।

ট্রাম চলল। মনের মধ্যে ছেলেবেলার দিনগুলো ঘুরে বেড়াচ্ছে। সেই দিনাজপুরের শহর—যষ্ঠীতলার বটগাছ, কাঞ্চন নদীর ধারে, পুরোনো সাহেবি গোরস্থানের পাশে পাশে সেই পথ। আম জাম বিলিতি পাকুড়ের ছায়া, লাটা গিয়ে আর বৈচিত্র বন, সেই শঙ্খচিল, শেয়াল গোসাপ আর গোখরোর খোলস। তার ভিতর দিয়ে চলেছি। ভিতরে কাঁপছে অ্যাডভেঞ্চারের নেশা—দূরের আকাশে উড়ন্ত মস্ত গগনবেড় পাখিটার মতো কল্পনাও ডানা মেলেছে। এই পথটাও তো হয়ে যেতে পারে আফ্রিকার জঙ্গল—এসে হাজির হতে পারে গরিলা, সামনে লাফিয়ে পড়তে পারে সিংহ—বাইসনের সঙ্গে বাধতে পারে চিতাবাঘের লড়াই—চারিদিক থরথর করে কেঁপে উঠতে পারে বুনো হাতির গর্জনে। ছেলেবেলার সেই ছুটির দিন—স্বপ্নভরা দুপুর বকের ভিতর যেন বিমবিম করে বাজতে লাগল।

চমক ভেঙে দেখি, গাড়ি এসপ্লানেডে এসে ঢুকেছে। নেমে পড়লাম। কার্জন পার্কের পাশ কাটিয়ে, মনুমেন্ট ছাড়িয়ে, এগিয়ে গেলাম আরো খানিকটা। তারপর নিরিবিলা দেখে এক জায়গায় ঘাসের ওপর পা ছড়িয়ে বসে পড়লাম।

বকের কাছে বইটা এখনো ধরা। কোলের ওপর নামিয়ে রাখলাম। সম্ভ্যার আবছায়াতে গাঢ় সবুজ বড়ো বড়ো অক্ষরে লেখা ‘গহন বনের গল্প’ বাপসা হয়ে আসছে। কিন্তু ছেলেবেলার হারানো দুপুরের রোদ লেগে ওই লেখাটাই ঝকঝক করে জ্বলতে লাগল বকের ভিতরে।

সেই দিনটার কথা মনে পড়ছে। একেবারে পরিষ্কার ছবি দেখছি চোখে।

নিঝুম দুপুর। গরম হাওয়া বইছে। আমে রং ধরতে শুরু হয়েছে। মাঝখানে টার্মিনাল পরীক্ষা, তারপরেই গ্রীষ্মের ছুটি। ইস্কুলে আর মন বসতে চায় না। জানলা দিয়ে ঘন ঘন বাইরে তাকাই আর ভাবি—কখন লাস্ট পিরিয়ডের ঘন্টা পড়বে।

ড্রয়িং-এর ক্লাস নিচ্ছেন মৌলভি সাহেব। ভারি নিরীহ ভালোমানুষ। একটা ছোট্ট বোড়ার পিঠে জিনের বদলে একখানা কাঁথা বসিয়ে তাতেই চেপে ইস্কুলে আসতেন। আর ক্লাসে ঢুকে ব্ল্যাকবোর্ডে একটি ঘটি কিংবা বেগুন যা-হোক কিছু এঁকে দিয়ে সঙ্গে সঙ্গে ঘুমিয়ে পড়তেন।

পড়ে কী বুঝলে ?

1. ‘সেই বইটি’ গল্পটিতে কোন বই-র কথা

বলা হয়েছে ?

ক. গহন বনের গল্প

খ. গহন কাননের গল্প

গ. গহন অরণ্যের গল্প

2. প্রকাশকের দোকান থেকে বইটি

হাতে নিয়ে লেখক কোথায় এসে বসলেন ?

ক. মনুমেন্টের তলায়

খ. এসপ্লানেডে

গ. কার্জন পার্কে

ঘ. গাড়ের মাঠে

হেডমাস্টার কাছাকাছি না থাকলে ছেলেরা কেউ কেউ এই ফাঁকে তাঁর গোবেচারা ঘোড়াটায় চাপবার চেষ্টা করত। কেউ বা বেগুনের বদলে তাঁর মুখ আঁকত খাতায়। কোনোদিন ভ্রুক্ষেপ মাত্র না করে নিশ্চিন্তে ঘুমোতেন মৌলভি সাহেব। বেশি গোলমাল হলে কখনো কখনো ঘুম-ভরা চোখ তুলে আলগা ধমক দিয়ে বলতেন, এই এত গোলমাল হচ্ছে ক্যান? কানটা যে ফাটাই দিলে হে আমার!

এই মৌলভি সাহেবের ক্লাসেই—এমনি একটা মন-উড়ু-উড়ু দুপুরে এসে দেখা দিল ‘গহন বনের গল্প’।

যথারীতি একটা কুমড়ো এঁকে দিয়ে মৌলভি সাহেব ঘুমিয়ে পড়েছেন। আমি আর আমার পরম বন্ধু বাচ্চু সেন খাতায় কাটাকাটি খেলছি। এমন সময় চোখে পড়ল, সেকেন্ড বেঞ্চে বসে খগেন বড়াল খুব মন দিয়ে কী একখানা বই পড়ছে।

ব্যাপারটা একটু নতুন। ড্রয়িং ক্লাসের ছেলে খগেন, ভলো ছবির হাত। ওর আঁকা কুমড়োকে কখনো ঝিঙে বলে ভুল হয় না—মৌলভি সাহেব ওকে দশের মধ্যে এগারো নম্বর দিয়ে পারলে খুশি হন। এ-হেন খগেন ড্রয়িং ভুলে গিয়ে বই পড়ছে। কিম্বাচর্যম্।

—কী বই রে ওটা খগেন? —কৌতূহল সামলাতে পারলাম না।

খগেন জবাব দিলে না। একেবারে তন্ময়।

—এই বল না—কী বই?

খগেন ভারি বিরক্ত হল। রুদ্ধশ্বাসে বইয়ের একটা পাতা উলটে বললে, এখন ভীষণ ব্যাপার। রাস্তির বেলা সিংহ এসে শিকারিকে তাঁবু থেকে ধরে নিয়ে যাচ্ছে। গোলমাল করিসনি এখন!

শুনেই রোমাঞ্চ হল। থাবা দিয়ে বললাম, দে না একটু দেখি!

ঝট করে বইটা সরিয়ে নিল খগেন। চোখ পাকিয়ে বললে, খবরদার রঞ্জন, মারা—মারি হয়ে যাবে বলছি!

মৌলভি সাহেবের ঘুম ভাঙল।

—হাঁ হে, তুমরা কী এইটাক খেলার মাঠ পাইছ? বেশি গোলমাল হইলে সব হাফ ডাউন করাই দিব—হুঁ!

তখনকার মতো শান্তি রক্ষা হল—কিন্তু কৌতূহলে মন ছটফট করতে লাগল। তারপর গোপীবাবুর অঙ্কের ক্লাস—যমের ঘন্টা। ‘গহন বনের গল্প’ ধামা-চাপা রইল কিছুক্ষণ। কিন্তু ছুটি হতেই ফেউয়ের মতো লেগে গেলাম খগেনের পিছনে।

— দে না ভাই, একটু দেখি বইটা ।

খগেন বললে, আমার বই নয় । পড়বার জন্য চেয়ে এনেছি । আজই সন্কেবেলা ফেরত দিতে হবে ।

— আমি তো আর নিচ্ছি না, হাতে করে দেখব শুধু । দে না একবার—

খগেনের করুণা হল । বই-খাতার তলা থেকে সন্তর্পণে বইটা বের করে দিলে ।

কিন্তু না দেখলেই ভালো হত । মোটা, বড়ো সাইজের বই—পাতায় পাতায় বুনো জানোয়ারের রোমাঞ্চকর ছবি । ছোট বড়ো অসংখ্য গল্প—কোনোটা ‘মানুষখেকো সিংহ’, কোনোটা ‘গরিলার বিভীষিকা’, কোনোটা ‘কুমিরের করাল গ্রাস’ । পড়বার আগেই গা হুমহুম করে ওঠে ।

চমক ভাঙল খগেনের চিংকারে ।

—বাঃ—দেখবার নাম করে বেশ পড়া শুরু হয়ে গেছে তো । ও সব চালাকি চলবে না, দাও বই । ছোঁ মেরে বইটা কেড়ে নিলে খগেন । বই তো নিলে না—যেন হৃৎপিণ্ড উপড়ে নিলে ! তারপরই আর কথা নেই হন-হন করে হাঁটতে শুরু করলে বাড়ির দিকে ।

পড়ে কী বুঝলে ?

1. মৌলভি সাহেব কিসে চড়ে ফুলে আসতেন ?

ক. রিক্সা খ. ঘোড়া
গ. হাতি ঘ. সাইকেল

2. ‘গহন বনের গল্প’ বইটি প্রথম কার হাতে দেখা গিয়েছিল ?

ক. কুঞ্জ খ. বাচ্চু
গ. খগেন ঘ. মৌলভি সাহেব

3. কুঞ্জ কোথায় থাকতো ?

ক. কালীতলা খ. শিবতলা
গ. মনসাতলা

আমি তবু সঙ্গ ছাড়ি না খগেনের ।

— একদিনের জন্য দিবি ভাই বইটা ? একবেলার জন্য ?

— বললাম তো, আমার বই নয় । আমাকে এড়াবার জন্য খগেন আরো জোরে পা চালালে, অপরের কাছ থেকে এনেছি । সন্কেবেলায় ফেরত দিতে হবে ।

— কার বই ?

— কালীতলার কুঞ্জর । হল তো ? ইচ্ছে হয় তার

কাছ থেকে চেয়ে নাও । বইটা পাছে আমি কেড়ে নিই, হয়তো এই ভয়েই খগেন একটা চলতি ঘোড়ার গাড়ির পিছনে উঠে বসল ।

হতাশ চোখে আমি সেদিকে তাকিয়ে রইলাম ।

কিন্তু কালীতলার কুঞ্জ ! মনটা ভয়ানক দমে গেল । কুঞ্জকে চিনি বিলক্ষণ চিনি । গত দোলের সময়ও ওদের পাড়ার সঙ্গে আমাদের পাড়ার ছেলেদের বেশ একচোট মারামারি হয়ে গেছে—আমি

নিজেই কয়েক ঘা বসিয়েছিলাম কুঞ্জকে । তা ছাড়া আমাদের সমবয়সি হলেও কুঞ্জ যে-পরিমাণে এঁচোড়ে পেকেছে তার তুলনা হয় না । ক্লাস ফাইভেই একবার ফেল করেছে—শুনেছি, সিগারেট খায় । সেই কুঞ্জর কাছে গিয়ে বই চাইতে হবে !

সম্ভব হলে নিজেই কিনতে পারতাম একখানা । কিন্তু বইয়ের দামটা দেখে নিয়েছি চোখের পলকে—তিন টাকা । তিন টাকা ! স্বপ্নের চেয়েও অসম্ভব ! ইস্কুলের পয়সা বাঁচিয়ে আনা—ছয়েক সঞ্চয় করেছি নিজের কাছে । মা'র কাছে জমা আছে আট আনা । আরো আনা—আষ্টেক ছোড়দি দিলেও দিতে পারে—বিয়ের পর শ্বশুরবাড়ি থেকে ফিরে এসেছে—মনটা খুশি আছে ছোড়দির । কিন্তু তিন টাকা । সে অনেক দূর, সেখানে পৌঁছোবার কোনো উপায়ই নেই ।

একটা ভারি মন নিয়ে বাড়ি ফিরলাম ।

মা বললেন, মুখ অমন কেন রে ? মার খেয়েছিস নাকি ইস্কুলে ?

—না ।

হাতমুখ ধুয়ে জলখাবারের দুধ-রুটি খেয়েই আবার বেরিয়ে পড়লাম উর্ধ্বশ্বাসে । পাড়ার মাঠে ফুটবল খেলা হচ্ছে—ওরা ডাকল, আমি ফিরেও তাকালাম না । যেমন করে হোক, কুঞ্জকে আমার ধরা চাই-ই ।

কুঞ্জকে পেতে অবশ্য দেরি হল না । স্টেশনের কাছে বাহাদুর বাজারের এক চায়ের দোকানে নিয়মিত বিকেলে আড্ডা দিতে দেখেছি ওকে । আজও সেইখানে ছিল সে । দুটো মস্ত মস্ত ধেড়ে ছেলের সঙ্গে হাত-পা ছুঁড়ে কী আলোচনা করছিল ।

বাবার কড়া হুকুম—রাস্তার কোনো চায়ের দোকানে ঢোকা আমাদের বারণ । আরো বিশেষ করে এ দোকানটা যত পাজি ছেলের আড্ডা । দোকানটার সামনে এসে আমার বুক কাঁপতে লাগল ।

কিন্তু ‘গহন বনের গল্প’—পাতায় পাতায় তার ছবি, তার ‘গরিলার বিভীষিকা’ আর ‘মানুষখেকো সিংহ’ একটা অসহ্য তীব্র স্বরের মতো আমার মাথার মধ্যে কাঁপছে আমি আর থাকতে পারলাম না ।

দোকানে ঢুকে ডাকলাম—কুঞ্জ !

কুঞ্জ প্রথমটা চমকে গেল । তারপর অদ্ভুত ভঙ্গিতে মুখ ভেংচে বললে, কী হে গুডবয় এখানে ?

বললাম, তোর সঙ্গে আমার একটা কথা আছে ।

— কী কথা ? আমার কাছে কী দরকার তোর—আমাদের ছায়া মাড়ালেও তো তাদের গুড কন্ডাক্টের প্রাইজ পাওয়া নষ্ট হয়ে যাবে । তেমনি ভ্যাংচানির ভঙ্গিতে কুঞ্জ হেসে উঠল ।

—তোর বইটা একবার পড়তে দিবি আমাকে ? অপমানে কান জ্বালা করছিল তবু না বলে থাকতে পারলাম না ।

— আমার বই ? কী বই ?

— ‘গহন বনের গল্প’ ।

— ও ! খোঁজ পেয়েছ তাহলে !— কুঞ্জর চোখ মিটমিট করতে লাগল সে তো আমার কাছে নেই ।

— জানি ! খগেন নিয়েছে । আজ সন্ধে বেলাতে ফেরত দেবে । আমি মিনতি করলাম আজ রাত্রিটা আমায় পড়তে দে, কাল সকালেই তোকে দিয়ে যাব ।

কুঞ্জ কিছুক্ষণ তাকিয়ে রইল আমার দিকে । তারপর নাক কুঁচকে বললে, কেন দেব তোকে ?

— ভাই কুঞ্জ—

কুঞ্জ আবার ভেংচি কেটে বললে, অত ভাই-ভাই করতে হবে না । মারামারির সময় মনে থাকে না ?

এর পরে চায়ের দোকান থেকে সোজা বেরিয়ে আসা উচিত ছিল । কিন্তু পারলাম না আমার ভেতরে তখনো জ্বরের মতো নেশাটা কাঁপছে ! নিশির ডাকের মতো হাতছানি দিয়ে ডাকছে আমাকে !

বললাম যা হয়ে গেছে, হয়ে গেছে । আজ থেকে আমরা বন্ধু ।

— বন্ধু !—কুঞ্জর চোখ আবার মিটমিট করতে লাগল, তাহলে প্রমাণ দেখা ।

— কী প্রমাণ দেব ?

— চা খাওয়া, চপ খাওয়া ।

চা ! চপ ! চোখের সামনে অন্ধকার দেখলাম । বললাম, ভাই, পয়সা নেই ।

— পয়সা নেই ? — কুঞ্জ আমার শার্টের পকেটটা নাড়া দিলে, ওই তো ঝনঝন করে উঠল । নেই মানে ? ফাঁকি দিয়ে বন্ধুত্ব পাতিয়ে বই বাগাবার মতলব ? সেটি হচ্ছে না চাঁদ !

— কিন্তু এ পয়সা তো—আমি ঢোক গিললাম, ইনস্ট্রুমেন্ট বক্স কেনবার জন্য এনেছি ।

কুঞ্জ খিঁচিয়ে উঠল তবে ভাই কেনো গে না । মন দিয়ে লেখাপড়া করো গে । গল্পের বই নিয়ে কী হবে ? যা—পালা এখান থেকে !

পালাতে পারলে বাঁচতাম, কিন্তু কে যেন পা দুটো পাথর দিয়ে আটকে দিয়েছে আমার । বুকের মধ্যে যেন বাড় বইছে ! এত কষ্ট করেও পাব না বইটা ? হাতের কাছে এসেও এমন করে ফসকে যাবে ?

বয়টাকে পয়সা দিয়ে কুঞ্জ একটা টেকুর তুলল !

— বেড়ে খাওয়ালি রঞ্জু । অনেকদিন মনে থাকবে । এবার একটা সিগারেট খাওয়া ।

— সিগারেট !—আমার মাথার চুল খাড়া হয়ে উঠল !

— হ্যাঁ—হ্যাঁ বাবা, সিগারেট । আরো দুটো পয়সা ঝাড়ো দেখি !

আবার পালাতে চাইলাম, কিন্তু পা দুটো তখন যেন পাথর দিয়ে বাঁধা । মন্ত্রমুগ্ধের মতোই দুটো পয়সা বের করে দিলাম । বয়টাকে দিয়ে কুঞ্জ সিগারেট আনাল । ধরিয়ে একটা টান দিয়ে বললে, আঃ!

ততক্ষণে আমার বুকের রক্ত জল হয়ে গেছে । প্রাণপণে উঠে দাঁড়িলাম ।

— সব তো হল ভাই । এবার বই ?

কুঞ্জ খানিকটা ধোঁয়া ছেড়ে বললে, নিস কাল সকালে ।

— কাল সকালে আবার কেন ? — আমি প্রায় হাহাকার করে উঠলাম, বললি যে রান্তিরেই !

— কুঞ্জ বাধা দিয়ে বললে, এখন কে বাড়ি ফিরবে ? আমার যেতে সেই নটা । সিনেমায় যাব কিনা ? যা—যা—কাল সকালে আসিস আমাদের বাড়ি । বই নিয়ে যাবি, ইচ্ছেমতো রাখতে পারবি দু’তিন দিন ।

— কিন্তু সকালে যে মাস্টারমশাই আসবেন ।

— তার আমি কী করব ? — কুঞ্জ উঠে দাঁড়াল—লম্বা একটা শিস টেনে বেরিয়ে এল চায়ের দোকান থেকে । পেছনে-পেছনে আমিও এলাম ।

— চল না ভাই একবার, পাঁচ মিনিটের জন্য । আমি মিনতি করলাম ।

— কেন বিরক্ত করছিস ? কুঞ্জ চটে গেল, বললাম না, সকালে আসিস ? তারপরই সংক্ষেপে সব শেষ করে দিয়ে অন্য রাস্তায় পা চালিয়ে দিলে ।

অস্বস্তি আর অপরাধ-বোধ নিয়ে বাড়ি ফিরলাম । অতটা না করলেও হত । একখানা বইয়ের অন্য যে কাণ্ড করেছি, একবার তা জানাজানি হয়ে গেলে কী যে হবে, সেকথা ভাবতেও পারছি না ।

তবু অপরাধের লজ্জা বেশিক্ষণ রইল না । চোখের সামনে জ্বলজ্বল করতে লাগল মোটা-মোটা সবুজ অক্ষরগুলো, ‘গহন বনের গল্প’ । সারা রাত ধরে আফ্রিকার জঙ্গলের স্বপ্ন দেখলাম আমি । বইয়ের পাতায় চকিতের জন্য দেখা ছবিগুলো যেন জীবন্ত হয়ে উঠে আমার সমস্ত চেতনাকে আশ্চর্য অপরূপ অ্যাডভেঞ্চার দিয়ে ঘিরে রাখল ।

ভোরের আলো ফোটবার আগেই ঘুম থেকে লাফিয়ে উঠলাম । তারপর জামাটা গায়ে চড়িয়ে

উর্ধ্বাঙ্গে ছুটলাম কালীতলার উদ্দেশে ।

মা অবাক হয়ে বললেন, হাঁরে, এত ভোরে কোথায় চললি এভাবে ?

মায়ের কাছে কখনো মিথ্যা বলিনি । আজ প্রথম বলতে হল । — একটু মর্নিংওয়াক করে আসি মা ।

উত্তরে মা কী বললেন সে কথা শোনার সময় আমার ছিল না । আমি তখন দার্জিলিং মেলের মতো চলেছি কালীতলার দিকে । আমাদের বাড়ি থেকে কুঞ্জদের পাড়া প্রায় এক মাইল । মনে হচ্ছিল, যদি এক লাফে পৌছোতে পারতাম !

এখুনি পাব ! এখুনি হাতে আসবে ! কালকের সারা বিকেল, সারা সন্ধ্যা, সারা রাত্রি যা নিয়ে স্বপ্নের ঘোরে কেটেছে — যার জন্য চায়ের দোকানে ঢুকেছি, কুঞ্জকে সিগারেট খাইয়েছি—মিথ্যা কথা বলেছি মায়ের কাছে—এখনই সেই মহা-সম্পদ এসে যাবে আমার হাতের মুঠোয় ! মনে হল, আমার পা চলছে না, হাওয়ায় উড়ে যাচ্ছি আমি !

ওদের বাড়ির সামনে গিয়ে হাঁপাতে-হাঁপাতে চোঁচাতে লাগলাম কুঞ্জ — কুঞ্জ — কুঞ্জ —

ঘুম-ভাঙা চোখ কচলাতে-কচলাতে বেরিয়ে এল কুঞ্জ । বিরক্তির মুখে বললে, কি রে, কী হল ? এই সাত-সকালে অমন চোঁচিয়ে মরছিস কেন ?

পড়ে কী বুঝলে ?

1. 'গহন বনের গল্প' বইটি আসলে কার ছিল ?

ক. কুঞ্জর খ. খগেনের
গ. রত্নার ঘ. বাচ্চুর

2. 'গহন বনের গল্প' বইটির মূল বিষয় (থিম) কী ছিল ?

ক. অ্যাডভেঞ্চার বিষয়ক খ. রোমান্স বিষয়ক
গ. প্রকৃতি বিষয়ক

3. রত্নার বইটা পেলো না কেন ?

— সেই বইটা ?

— কোন বই ? — কুঞ্জ যেন আকাশ থেকে পড়ল ।

— সেই 'গহন বনের গল্প' ।

কুঞ্জ বললে, অ । তা, সে বই তো পাবি না !

— পাব না ! — আমি যেন বুকফাটা আতর্জনাদ করে উঠলাম ।

কুঞ্জ নিরাসক্ত স্বরে বললে, বই তো আমার নয়—আমার মামাতো বোন রত্নার । রত্না কাল রাতের

ট্রেনে কলকাতায় ফিরে গেছে, বইটাও নিয়ে গেছে ।

আর এক মিনিট সামনে থাকলে আমি কুঞ্জর ওপর ঝাঁপিয়ে পড়তাম, আফ্রিকার সিংহের মতোই ছিঁড়ে টুকরো-টুকরো করে ফেলতাম ওকে । তার আগেই ও বাড়ির ভেতর অদৃশ্য হয়ে গেছে ।

আবার বাড়ি ফিরলাম । এবার আর হাওয়ায় উড়ে নয় । চোখ ফেটে আবার কান্না আসছে—পা যেন মাটির মধ্যে বসে যাচ্ছে । এইভাবে বিশ্বাসঘাতকতা করল কুঞ্জ । পুরোনো শত্রুতার শোধ নিলে এমন করে !

যখন বাড়ি ফিরলাম তখন মাস্টারমশাই এসে বসে আছেন ।

— এতক্ষণ কোথায় ছিলে রঞ্জু ? — শাস্ত, গম্ভীর গলায় মাস্টারমশাই জানতে চাইলেন ।

— মর্নিংওয়াক করতে । বিবর্ণ মুখে জবাব দিলাম । পড়ার বই নামিয়ে আনলাম শেলফ থেকে ।

কিছুক্ষণ আমার দিকে অদ্ভুত চোখে চেয়ে রইলেন মাস্টারমশাই । তারপর জিজ্ঞাসা করলেন, ইনস্ট্রুমেন্ট বক্স কোথায় ?

আমার বুকটা ধক করে উঠল একবার । আস্তে আস্তে বললাম, কাল বিকেলে ভুলে গিয়েছিলাম । আজ কিনে আনব ।

— ভুলে গিয়েছিলে ? মাস্টারমশাইয়ের চোখ আগুন হয়ে উঠল কুঞ্জর সঙ্গে চায়ের দোকানে আড্ডা দিলে ভুলে যাওয়ারই কথা—কী বলো ?

পরক্ষণেই একটি চড় এসে পড়ল আমার গালে । মাস্টারমশাই বজ্রের মতো গর্জে উঠলেন চায়ের দোকানে ঢুকতে শিখছ । সিগারেট খেতে শিখছ ? রাস্কেল—বাঁদর—

আর—একটা চড় এসে পড়ল গালে । মাথা ঘুরে গেল—একটা তীর ঝাঁঝির ডাকের মধ্যে যেন মিলিয়ে গেল পৃথিবীখানা ।

চমক ভাঙল আমার । কুড়ি বছরের ওপার থেকে ফিরে এসেছি বর্তমানের মধ্যে । গড়ের মাঠে ঠান্ডা রাত নেমে এসেছে । কোলের ওপর ‘গহন বনের গল্প’ একাকার হয়ে গেছে অস্বাকারে ।

বইটাকে তেমনি বুকে চেপে ধরে আমি হাঁটতে লাগলাম ।

এতদিন পরে ফিরে এসেছে । এ বই এখন আমার । যতবার খুশি পড়তে পারি ইচ্ছে করলে মুখস্থ করতে পারি—পাড়ার সকলকে ডেকে-ডেকে পড়ে শোনাতে পারি ।

কিন্তু কিছুই করব না । আমার লাইব্রেরির পাঁচ হাজার বইয়ের ভিতর—দিশি-বিলিতি অজস্র বইয়ের মাঝখানে ওকে আমি লুকিয়ে রাখব । আমি এ বই পড়ব না । যদি আজ আর ভালো না লাগে ? কুড়ি বছর আগেকার মনটা এর মধ্যে যদি বদলে গিয়ে থাকে —

তাহলে ? তাহলে ?

জেনে রাখো

প্রকাশক	—	যে ব্যক্তি পুস্তক ইত্যাদি ছেপে প্রকাশ করে।
গবেষণা	—	কোন তত্ত্বের অনুসন্ধান বা খোঁজা।
হরফ	—	অক্ষর
অযাচিত	—	অপ্রার্থিত
গোরস্থান	—	কবরখানা
গহন	—	গভীর
কিমাশ্চর্যম্	—	কি আশ্চর্য
সম্ভূর্ণে	—	অতি সাবধান
বিলক্ষণ	—	ভাল রকম
নিরাসক্ত	—	উদাসীন
বিশ্বাসঘাতকতা	—	বেইমানী
অজস্র	—	অনেক

পাঠবোধ

খালি জায়গায় সঠিক শব্দটি লেখো

1. গল্পটির লেখক নারায়ণ গঙ্গোপাধ্যায়।
(বাড়িওয়ানা, সেই বইটি)
2. অঙ্কের মাস্টারের নাম ছিল।
(মৌলভি সাহেব, গোপীবাবু)
3. ড্রইং ভাল করতো।
(কুঞ্জ, খগেন)

4. বইটির দাম ছিল টাকা ।

(তিন, চার)

অতি সংক্ষেপে লেখো

5. পরিণত বয়সে লেখক 'গহন বনের গল্প' বইটি কোথায় দেখতে পেলেন ?
6. রঞ্জনের ছোটবেলা কোথায় কেটেছে ?
7. খগেন বইটি কার থেকে এনেছিল ?
8. 'গহন বনের গল্প' বইটির পাতায় পাতায় কিসের ছবি ছিল ?
9. রঞ্জনের কাছে কোন জিনিস কেনার পয়সা ছিল, যা দিয়ে তাকে কুঞ্জকে খাওয়াতে হয়েছিল ?
10. সকাল বেলায় রঞ্জন কেন কুঞ্জর বাড়ি যেতে অনিচ্ছা প্রকাশ করেছিল ?

সংক্ষেপে লেখো

11. 'গহন বনের গল্প' বইটি প্রকাশকের দোকানে বসে হঠাৎ দেখতে পেয়ে লেখক বইটি অত আগ্রহের সঙ্গে কেন নিয়ে নিলেন ?
12. ট্রামে উঠে লেখকের ছোটবেলার কোন ঘটনার কথা মনে পড়ছিল ?
13. ড্রইং স্যার মৌলভি সাহেব ড্রইং কিভাবে শেখাতেন ?
14. কুঞ্জ কে ছিল ?
15. রঞ্জন কেন মা-কে মিথ্যা কথা বলেছিল ?
16. মাস্টার মশাই রঞ্জনকে কিভাবে শাস্তি দিলেন ?

বিস্তারিত ভাবে লেখো

17. 'গহন বনের গল্প' বইটির কী এমন বিশেষত্ব ছিল, যার জন্য রঞ্জন বইটির প্রতি এত গভীরভাবে আকৃষ্ট হয়ে পড়েছিল ?
18. 'গহন বনের গল্প' বইটি পাওয়ার জন্য রঞ্জন কী করেছিল, তা নিজের মতো করে লেখো ।
19. বইটি হাতের মুঠোর মধ্যে পেয়েও লেখক কেন বইটি পড়বেন না বলে স্থির করেছিলেন ?

ব্যাকরণ ও নিৰ্মিতি

1. বহুপদের একপদে পরিণত করো

পাটনাতে জাত

জীবন পর্যন্ত,

জলে ও স্থলে চরে যে,

জানবার ইচ্ছা,

যা চিরকাল মনে রাখবার যোগ্য,

খরচের হিসাব নেই যার ।

2. নিচের ব্যাসবাক্যগুলি সমাসবদ্ধ করো ও সমাসের নাম লেখো

শত শব্দের সমাহার,

পুরুষ সিংহের ন্যায়,

ভাতের অভাব,

জায়া ও পতি,

সুন্দর গন্ধ যার,

শক্তিকে অতিক্রম না করে ।

3. বাংলা শব্দভান্ডারে নিম্নলিখিত শব্দগুলির কোনটি কোন শ্রেণির লেখো

আয়না,

মা,

হাত,

ফুল,

পেন্সিল,

বারান্দা,

ঝিঙ্গা,

ইডলি,

টিকিট,

চিনি,

চাঁদ,

পেরেক

